

閩南華僑私立女子
中學校六周年

(180)

1926年

本校落成及雷校長夫婦四十雙壽徵詩文集序

創學校難。創女校尤難。創女校而歷地萬里。苦口捐貲。則尤尤難。余於本校校長雷一鳴先生見之焉。先生具偉卓之識。懷遠大之抱。學富古今。文通中外。弱冠而司鐸學府。壯年而參事軍門。犧牲一己之身。共復閩南之地。維社會。奠邦家。勞績之宏。遐邇咸羨。近憫坤德墜落。女學不興。毅然以培養師表羣倫。啓十閩女子之學識自命。乃不辭梯山航海之艱辛。而渡萬里重洋。歷數十海島。廣其舌。盡其心。到處募捐。竟得吾僑洋國人之血汗金錢以歸。遂成立斯校於廈門。學級始辦小學而增至初中。校舍先建舊齋而續造新舍。經營數載。成績昭然。立此莊嚴燦爛之女學機關於思明新府。徵先生之力。曷克臻於此歟。且其願又未足也。前年秋。重遊南國。募捐巨金。閱時半。年。歷劫無數。幸險途力進。初志不移。始得集腋成裘。滿載而返。斯校之經過。得以維持。方先生之初到外洋也。南僑鄉人。觀其懷抱。欣然色喜。咸願解囊捐資。以成斯舉。及其重履彼地也。斯校董事。審其成績。怡然心歡。更願竭力相助。以固校基。在僑洋諸君子之急公尚義。固有可風。而先生之毅力熱心。亦有可表。視彼藉公行私。毫無建樹。不啻泰山之於邱垤。河海之於行潦也。語云。有志事竟成。然則先生行人之所難行。爲人之所難爲者。其惟志之所在乎。前歲斯校落成。又逢先生與其夫人四旬雙壽。而余忝在摯好。曾爲之徵求詩文。以頌斯盛。今此集將付剞劂。謹系一言。以弁其首云。丙寅仲夏。晉江曾文英謹識。

序言

華僑女子師範校之在廈門。成立六年矣。廈門六年之前。未有斯校也。而突有斯校者。蓋南洋華僑諸君集貲之有成功也。南洋廣矣。華僑衆矣。集貲宜不難。雖然。苟無熱心毅力。爲衆所信任者。呼籲於其旁。又無氣順利貞。爲衆所景仰者。贊助於其內。則雖欲集貲而成此鉅麗美備之校。其何道之從乎。嗚呼。此不得不歎雷君一鳴賢伉儷之力勤而成功大也。雷君之誠懇。必爲華僑諸君所信任。其夫人之明達。又爲華僑諸君所景仰。而此廈門華僑女子師範校。遂巍然煥然。以告成之。且六年蒸蒸日上。以至於十年百年。可操券俟也。且師範之義重矣。女子之師範。尤重之重矣。師範立而後教育成。女子師範進而後教育之收功益大。異日者廈門女子之教育。其必卓然可冠全閩也。此則六年以後。此校莫大之成績。綿綿延延。以至於十年百年。未有艾也。而亦莫非雷君夫婦之所造端也。余以曾君文英之函告。而督之爲文。謂曾君與雷君相知之深。用以知曾君者。知雷君也。故不辭而爲之序。

江南朱家驊

余與雷君一鳴。同寓於廈地。又同從事於教育。雖各以所職羈身。弗獲昕夕過從。相與溯興學之原始。窮立教之旨歸。而於其手創之華僑女學。則固嘗見此都人士多有稱及之者。知其得譽當非虛也。今夫士君子懷抱偉志。不能出而與世周旋。而惟是皋比坐擁。度寬閒之歲月。博公衆之揄揚。自問要足悲矣。雷君其亦有同感乎。大正十六年元春之月。雷君將有僑學落成。及六週紀念之發刊。其董事諸友爲之廣徵詩文。災諸梨棗。余不文又不能默爾而

息爰就所根觸於懷者。筆述一二以與雷君相互證。至其慘淡經營。良匠心苦。已有先我言之者矣。茲不贅及。是爲序。

旭瀛書院長岡本要八郎

吾國學校之興。垂二十年。未能振刷教育。擴張文化者。其道有二。非教化之不良。則經濟之不足。往者南安雷君一鳴。念莘莘學子。未得所師。遂設華僑女子學校於鷺江。躬詣南洋羣島。捐募八萬餘元。爲校中基金。乃出其講經考古之學。爲傳道解惑之用。六載以來。凡畢業於斯校者。率皆品詣純粹。學問優異。今歲九月爲校中六週紀念。及校舍落成之期。校中人士欲余一言爲雷君賀。余不文固辭不獲。乃爰書數語歸之。並以爲世之熱心教育者勸。

侯官吳山

吾中國女權之不振。至今日而極矣。深閨蟄處。甘爲男子所玩弄。而不知爭人格於天演淘汰之世。脫有不幸。彼號稱男子者。聚吾女界之神聖同胞。而污之辱之。踐之踏之。則亦任其污辱與踏踐已耳。權不吾操。迺顧盼自豪。以爲石榴裙下。固有被征服者在。惡知其所謂被征服者。方竊竊然笑。陋吾女界之無人格。遂放棄權利而莫之知也。吁。可傷已。然則何如斯可以振吾女權。雨香曰。惟先謀女界之教育。夫教育者。吾人生存之唯一問題。處今之時。遵今之制。未有不入學校而能成優美人材者。故亦未有不入學校而能具完全人格者。欲提高女界人格。舍教育末由。吾嘗求教育家於吾女界不可得。既乃得之於鬚眉者流。閩南雷一鳴先生。固號稱奇男子。而深致力於女界教育者也。其所主辦閩省華僑女子學校。成績斐然。溯自創始以至於今。已六週年矣。頗聞先生性恬退。不樂與俗子爭短長。然其於校務則盡心以圖。不肯稍懈。築舍逮西疇之暇。募捐作南洋之遊。迹其行事。誠女界之福星。揆其用心。

亦人間之生佛。吾華僑女界何幸而獲有先生之提撕。吾中國女界又何不幸而不獲一一爲先生所提撕也。吾竊望於吾女界者。得一先生不自滿。必當求千百如先生者。崇拜之。師承之。一方更淬勵精神。以圖與男子相頡頏。而脫離數千年壓制之苦痛。昌明女權之日。或有望乎。迺者曾君恨吾。承雷先生令。輯該校六週年刊。函來索吾弁言。吾不文。庸抒管見而書以歸之。國多賢豪。想不以吾言爲河漢。

吳陵丁胡雨香

從來女流之良莠。亦係國運之盛衰。是故姬周之興也。太王有周姜。王季有太任。文王有太姒。三代之亡也。夏桀以妹喜。商紂以妲己。周幽以褒姒。孰謂女子之不關於氣化哉。我國自古重男輕女。向無女學之設。女界中之人才。幾如晨星之寥落。今歐化東漸。大邑通都。女子學校林立。而南安一鳴雷先生。尤爲熱心女學。曾兩往南洋四十六埠。籌集鉅款。創設閩省華僑女子師範學校於廈門。兼添設女高師範。校舍落成。規模宏壯。美奐美輪。觀其講堂高敞。下列座位整齊。先生講而學生聽者。教授室也。盤盤焉。困困焉。蜂房水渦。不知其幾千萬落。中聞咕嚕。咿唔與潮聲齊響者。自習室也。左圖右史。玉軸牙籤。千卷萬卷。陳列有序者。圖書室也。鄴架之上。新聞紙重重疊疊。粲然可觀者。閱報室也。平原空曠。細草如茵。蒼翠一色者。操場也。花木清幽。飛鳥上下。可以助文章之興者。校園也。他如音樂儀器。種種設備。不一而足。其功不誠偉哉。從此培養裁成。薰陶涵育。異日女界之人才。轟轟烈烈。薈萃吾華。以文學著者。將如曹昭之續史。道韞之咏詩。以武功顯者。將如木蘭女之從征。梁夫人之助戰。以孝行稱者。將如緹縈之救父。盧氏之衛姑。以貞節傳者。將如夏侯女之割鼻。曹令女之斷臂。以內助名者。將如齊姜之醉遣。樂羊妻之斷機。以賢母號者。將如敬姜之勤績。孟母之擇鄰。若此者。巾幗鬚眉。真可謂萬世女子之師範。豈知但如薛靈芸之善裁製。雅

號鉞神已哉。茲當落成伊始。其成效可逆料而知。爰振筆而爲之序。

莆田林 鏗

廈門閩省女學校。爲南安雷先生之所創設也。總南海同安諸勝地。嶼峙嘉禾。合僑民土著以授經。帳施閨閣。絳唇朱袖。偏列文彬大雅之班。几席丹鉛。皆屬巾幗先生之輩。時而教以婦道。講周姜思媚之明文。時而教以完貞。說夏侯誓志之舊事。時而教以和諧如妯娌。則肅雍王姬。是則是效。時而教以致孝鬼神。則有齊季女。或嘏或歌。或教以職業。則披閱樓鑰耕織之圖。或教以經文。則令尋茂叔樂道之趣。類皆甄陶有術。體用兼全。魏志盛稱內助。明史詔修女誡。蓋有異世一轍焉。將來造就多方。裙釵中定多俊傑。純全四德。閨秀內自有聞人。豈止蘭英博士。稱才思之翩翾。崇嘏狀元。號文章之洒洒哉。茲蓋幸遇雷先生雅度薰人。婆心淑世。許魯齋躬任師儒。鄭子產人稱衆母。屬以閩南多故。鎮靜維持。及乎境內粗安。文明是主。遂乃脫却安南。募金建校。茲值堂基完飭。有志落成。君年適當強仕。淑儷亦且齊眉。併啓雙壽之筵。叨榮邦人之祝。名公題品。鴻案生光。賀客會來。鵝湖增色。從此學校有人焉。濟濟多士。無慚女士之名稱。先生傑出也。藹藹仁人。雙慶絳人之甲子。不佞遙仰門牆。豔稱福曜。乏郭璞生花之筆。未贊一詞。愧子雲奇字之文。徒存三嘆。咏詩未足壯其觀。作賦未能溢其美。表揚盛事。唯序最詳。若先生之偉伐。到處說斯。而不佞之綴詞。雖陋敢讓乎。爰序其事如右。

莆田林邦璋

余嘗謂國勢之不振。由民之無公德。民之無公德。則由在上者德育之不興。方今之世。熙來攘往。莫不惟利是務。夫觸風雨。犯寒暑。犧牲性命。以殉一己之利。而欲其以國事民生爲心。不以謬哉。此時局所以日壞也。然尙未遽亡者。徒以一二有心人。大聲疾呼。作中流之砥柱。蓋亦危矣。晉江曾恨吾君。熱心士也。余服膺久之。遂訂交焉。君以其所

撰雷君廈門華僑學校落成徵文啓見示。囑一言爲雷君及其夫人壽。受而讀之。不禁爲之狂喜。以手加額。爲中國前途賀。且益知恨吾之賢。而所交皆賢士也。雷君少盡心力於國家。引社會事爲己責。近復躬歷南洋羣島。募巨金以成斯校。其用心可謂苦矣。以視熙來攘往。以圖一己之利者。豈可同日而語哉。顧余才學膚陋。其何以壽雷君。而辱恨吾之介。又不能已於言。至今世之壽人者。諛辭盈紙。十無一當。余向恥之。雷君應亦恥之久矣。然則其何以壽雷君。夫雷君之志。久爲有心者所共欽。原不以腐儒一言爲輕重者。余惟願莘莘學子入斯校者。一以雷君之心爲心。卒業後各以此心授諸後學。愈推愈廣。將見中國人人皆如雷君之用心。則國勢之強。民德之厚。可計日而待矣。此蓋雷君之所樂聞也。卽以覆恨吾。且爲雷君及其夫人晉一觴。

合肥隱亭王逸

太上有立德。其次有立功。其次有立言。此之謂三不朽。夫以非常之人。必建不朽之業。能建不朽之業。則其爲壽也必無涯。吾求之當世而不可得。惟廈門雷一鳴先生。庶足以當之。而無愧焉。蓋雷先生之爲人也。富於道德。辛亥之役。閩南光復。多賴其力。厥功甚偉。又復盡力於教育。躬往南洋。籌款興學。教育事業。與立言相同。古之三不朽。有一於此。卽足以壽世。雷先生以一人而兼有此三者。其爲年壽又烏有艾哉。今歲雷先生創辦之閩省華僑女子學校。校舍落成。適逢雷先生及其夫人四秩雙壽。其摯友泉州曾文英先生謀所祝校福。而壽賢伉儷者。徵言於僕。僕海隅下士。愧不能如華封之祝。又不及張老之頌。直不敢致一言。卽言亦不足爲重。抑僕聞之。人之所以能稱壽者。必有足以爲壽者存。雷先生及其夫人因斯校之成而壽。而斯校之成。亦因雷先生及其夫人而壽。然則斯校也。足與賢伉儷並壽而無涯矣。而雷先生及其夫人之足以爲壽。自有不朽之業存。又豈特此一校而已哉。

虞山周知非

老友文英。客歲以徵求詩文啓。索余俚句。以祝雷君賢夫婦之華誕。並賀華僑女子師範校舍落成紀念也。乙丑春回。元宵節近。復來箋索余文。以爲光寵。余不文且拙於才。頻來戰鼓聲中。幾度驚心。刼後餘生。更無暇執筆爲文也。固辭不獲。握管而嘆曰。世事蜩螗。何時可平。軍閥勢炎。戰雲迷漫。教育破產。已達焦點。安有人出而集重資。創學校。爲作育英才計乎。惟南安之雷君一鳴。躬往南洋。捐金八萬。創辦女校於廈門。校舍旣成。絃誦聲起。從此女權擴大。咏絮才多。巾幗不讓於鬚眉。女兒亦勝於英雄。其功之大。甯有涯乎。雷君之仁心。可以見於此矣。邦人因女校落成之日。適逢雷君賢夫婦四旬雙壽良辰。欲思製錦以祝。聊表葵忱。余以爲雖不祝雷君賢夫婦之華誕。而雷君賢夫婦之芳名。可以與天地同春。校舍同壽矣。雷君斯舉。自壽其華誕。而慶其校舍落成也可。文英老友索文甚急。挑燈書此。以郵寄之。

常熟俞友清

曾文正曰。民之生庸弱者。戢戢皆是也。有好義之士。其智足以移十人者。必能拔十人中之尤者而材之。其智足以移百人者。必能拔百人中之尤者而材之。今南洋羣島。物博民富。閩人之經營其地者。以生以聚。以育其子孫。幾視彼邦爲樂土矣。以庸弱戢戢之民衆。而託庇於異族權力之下。祖國之感。彌切疚心。不有好義者力爲拔之。其得存於物競天擇之後者幾何矣。先生生於閩南。慨華僑之無援。傷女學之不振。毅然以興學育才爲職志。不殫勞瘁。遠涉重洋。雖險阻迭經。而志不稍懈。卒能捐集鉅款。達其所期。以建築莊嚴燦爛之女校於廈島。皇然煥然。與廈大集美諸校後先輝映。例以文正之言。拔其尤而材之。洵不誣矣。或謂女子職主中饋。惟議酒食。學奚爲者。今雷君之倡

女學。其殆非古歟。不知風詩三百。首列關雎。后姬之德。化被諸侯。班昭續漢史。宋氏通周官。史記所載。班班可考。是女學之由來久矣。何況今日男女平權之說。自西徂東。歐美列邦。女子且享有參權者。獨我國女子。尙蟄居深閨。蠢然不知古今之事變。其將何以圖存耶。此先生所以慘淡經營。煞費苦心。而有建築女校之盛舉也。自時厥後。女學勃興。教育普及。使婉婉處子。共進文明。翩翩令媛。亦增淑德。教澤普及。不亦孔溥乎。孟子以教育英才爲三樂之一。當茲校舍落成之會。適值先生強仕弧辰。與德配齊眉有慶。則桃李盈門。賓朋滿座。作南山之頌。詠九如之詩。先生其掀髯色喜。爲晉一觴乎。

古沈陳天隱

粵稽創母範於黃農。嫺祖之縑絲奏績。傳教臺於巢燧。女媧之煉石補天。進德修業。乾健與坤儀存誠。養正聖功。同人與童蒙求我。唐虞昭教胄之謨。帝王傳執中之統。觀型二女。京室一人。仰大任之懿德。思媚思齊。緬大姒之徽音。江沱江汜。師禮列宮娥。曹大家續完漢帙。才人昭唐代。徐惠妃援筆成文。慧姬振鐸爲嚴傳。咸稱巾幗先生。朝雲吹簾當健兒。須謂裙釵將士。故夏曰校。殷曰序。周曰庠。學共明倫於三代。頌多福。膺多壽。慶多男。華封禱於一人。斯蘭臺石室落成燕賀鶯遷。羨弧誕誕辰共慶鵲湖鹿洞。學紹尼山。勲昭廈水。高談滄桑塵海。歷攬文藻江山。此廈門閩南華僑女子學校落成。而並祝雷校長先生暨夫人四旬雙壽也。慨自法斃綱淪。人心梟獍。深感道微文弊。國勢蝸蟾。挽狂瀾於既倒。歎淪胥以將傾。罄精力於國家社會。著奇才於瑤島歐風。萃四十載之辛勞鼓輪浮海。歷四六埠之况瘁捐金奔波。八萬金南洋高義。三千侶西域歡情。卜築鷺門。頌鴻工之告竣。歌功燕會。祝鶴算之頻添。近將君賦洋旋。添設女高範校。以膠庠之北斗。作粉黛之南針。豈第蘇惠迴文。衛恆書法。蔡姬箏譜。道韞歌吟。吳絳仙本爲

詩客。好進紅箋。薛靈芸素號針神。可穿紫線也哉。強仕椿齡。偕年萱茂。圖繪雲漢雙星。眉齊鴻案。恭祝暮年百歲。心仰驥材。巍巍成功。邦人咸思雲霞以織錦。浩浩壇坫。國士亦歌日月之升恆。七言繇試。十韻麤成。握煙雲之手筆。青史千秋。頌松栢之年華。蒼天百祿。仿司馬而紀績。效公羊而祝齡。謹繪翠竹清泉。詠九秋於琴韻書聲之地。願歌黃花紅蓼。祝三多於華筵菊酒之天。

粵東大埔經史李國華

宋范仲淹之言曰。士當先天下之憂而憂。後天下之樂而樂。蓋當其憂時。不與樂謀。當其樂時。若代憂價。一憂一樂。每爲倚伏。交迭循環。不期然而然。不望報而報。如影之與形。因之與果。然終不計樂而願憂。亦決不因憂而卽思樂。憂其所當憂。樂其所可樂。其憂也爲公憂。其樂也爲公樂。憂則悲天憫人。樂則利人福國。吾友雷一鳴之憂樂有是夫。今夫天之賦才。不必男女殊也。余世居東山縣。東山四面爲海。業捕魚者。十室而九。男子十餘齡時。父兄輒絮到舟中。以大海爲學校。以得魚爲成績。遑問教育。逮於婦女。則未及笄者。除佐母氏提攜弟妹外。便是學習結網。其已育子抱孫者。比鄰過從。無他煦煦語。祇云日來兒女累。網少結矣。所謂婦德婦功。婦言婦容。皆因不識字置之。余心憫焉。民國十一年。倡辦紫東女校。家庭本是寒素。而地方又太礪瘠。無米難吹。婦莫稱巧。余手拮据。卒仗女兄少瓊半殫義務之力。迄今粗得秩序。宛如創定。思痛。乃益知創業如雷一鳴君者之艱難。何以故。雷君以一身爲閩南女校犧牲。始而構樓閣於空中。繼而造輪奐於指顧。櫛風沐雨。南度頻煩。去歲厯劫安南。固云國粹之厄。亦實公益之魔。蓋君之星韜者。無非爲謀拓裙釵幸福之心所迫而去者也。且夫莫爲之前。雖美弗彰。莫爲之後。雖盛弗繼。雷君之於華僑女校。不可謂彰而且繼者耶。今者校舍落成。無數辨琴咏絮。慧姬得以享藏脩息游之福。猶憶民九下學。

期。余忝任是校教席。雷君已苦心綢繆高井欄校址。迄今訪諸鷺江人。其時之女弟子。現已畢業而擔教育者。多以品學相尙。而廣廈又慶落成。余是以深佩雷君之熱誠焉。中庸曰。誠者天之道。思誠者人之道。又曰。故君子誠之爲貴。雷君誠於女學。斯以女學之成績報之。雷君夫人性慤樸。伊子貽棠於余問字頗恪愿。余藉悉其得於家庭教育者良多。茲逢雙壽。都人士各懷製錦稱觴之意。而兢社諸君子適以應人心之傾向。而余則以爲順天道之好還。蓋余之所云先天下之憂而憂。後天下之樂而樂者。理本不爽。影必隨形。雷君之爲女校擔憂之日。余已知其爲女校慶樂之時矣。是卽不期然而然。弗望報而報者。而余曾與共事安得而不喜。祝曰。名媛淑女。輩出不窮。木公金母。貺福恆豐。

東山縣陳寶善

茫茫島嶼。棋布星羅。顯富庶之狀態。而立於亞洲南部者。吾知其爲南洋羣島也。莘莘人羣。出作入息。操閩粵之語言。而聚於南洋羣島者。吾知其爲閩粵僑民也。以至多之閩粵僑民。而居至廣之南洋羣島。積資億萬。遍地皆然。聚族百千。數世不已。推原其故。蓋有特性存焉。何謂特性。關懷梓桑。注意教育是也。夫我僑洋人士之關懷梓桑。注意教育。捐貲而創辦國內學校。建築而振興國內民生者。誠數見不鮮見。吾亦不遑枚舉矣。吾之所欲舉者。其惟捐貲而創辦本校乎。當民九之秋也。吾校校長雷君一鳴。以提倡女子教育。創辦本校之名義。梯山航海。涉萬里之重洋。經數國之屬地。而告其故於吾僑洋人士之前。遂得四十六埠之贊助。獲十萬捐貲以歸。吾校小學及師範各部。皆于是乎成。由是僑生女子。得聯袂歸鄉。閩南裙釵。得把臂入林。而受吾校之教育者。數不可計。數年來畢學業者。或返南國。而報告成績於其父兄。或升學科。而研究專材於大學校。或具卓識。而建設良好之新家庭。或秉熱心。而力

任各地之苦教育。皆有優點而爲中外所咸欽。今者吾校開辦已六週年矣。在學諸生。習於中學者有兩級。小學部者有六級。幼稚部者有一級。數約二百餘人。其成績如何。自有批評者在。吾不敢妄論。惟思南洋諸國人。對於吾高聳入雲之校舍。加功刻苦之學生。尤能時時贊助之。鼓吹之。故不能已於言。噫。教育一端。最重男女平等。男有特設專門大學之研究。而女子亦不可無專門大學之脩養。然遍觀國內所設之專門大學。多爲男子而特設之。而未聞主教育者。有女子專門大學之設立。是女子之於今日。雖有受初中教育之機緣。而無受高級教育之地步。然則女子專門大學之設。其可緩哉。竊願在洋諸國人之熱心吾校中小教育者。此後尤能贊助吾校。使學級早得提高。而有專門大學之實現。則華僑女子教育前途之裨益。不亦大乎。故吾於吾校六週年刊材料彙集之日。而有望於南洋羣島之爲桑梓教育計而注存於吾校者。則女子教育庶乎有與男子平等之一日矣。

泉州曾文英

事以難能而可貴。財以善用斯爲美。本校雷校長一鳴。思興女教。費無所出。奮而南行。至再至三。足跡遍羣島。只憑三寸舌。竟集十萬金。歸而創辦華僑女學於廈地。不數年間。校宇新建。成績昭然。此非事之難能而可貴耶。雷君爲人磊落。固爲僑胞所景仰。而僑胞關懷桑梓。亦云至深且切。離故鄉幾千里。居異域數十年。無時無地不以國事爲念。凡教育實業尤捐貲不少吝。此原愛鄉熱誠之所致。然亦善用其財矣。視乎國內資本家拜金主義者流。地方公益慈善事業。一毛不拔。則何如。又夫廁足教育界。往往假學校爲噉飯地。以致文風日下。守業尙不及。遑論乎開創。方之雷君。則又何如。余因貴雷君事之難能。並美僑胞財之善用。爰綴數語。以爲國內之資本家及教育者勸矣。

壽甯犀溪葉 森

題詞

廈門華僑女子學校校舍落成紀念

昌明女教

蔭威將軍
陸軍上將
督辦福建軍務善後事宜周蔭人

廈門華僑女子學校校舍落成

坤教覃敷

福建省長薩鎮冰

閩南華僑私立女子中學校六週刊

題詞

閩南華僑私立女子中學校六週刊

題詞

廈門華僑女子學校校舍落成紀盛

女教先聲

福建教育廳廳長王孝績題

恭祝 華僑女子公學進步

德工並勵

蔡元培

華僑女子學校

樂育英才

朱泮藻題

華僑女子公學

女界曙光

陳爲銚

閩南華僑私立女子中學校六週刊

題詞

華僑女子師範學校鑒

閩南華僑私立女子中學校六週刊

題詞

離麗文明

晉江曾 迺拜題

華僑女子學校校舍落成紀念

女士歡顏

晉江教育局局長王冠羣贈

廈門華僑女學校六週落成紀念

女學曙光

乙丑瓜秋謝俊英恭頌

敬賀華僑女學成立並祝校長雷君夫婦四旬雙慶

女界慈航

江西昌社詩學顧問蔡鄭友雲敬題

閩南華僑私立女子中學校六週刊

題詞